

四庫全書

史部

欽定四庫全書

蜀中廣記卷二十五

明 曹學佺 撰

名勝記第二十五

川北道

保寧府二

巴州

山曰大巴小巴世所稱九十巴山也志云大巴之險遇

于棧道下通漢中又云小巴之南即古巴國繫年錄云巴之北境即米倉山下視興元出兵之孔道即今關堡相望矣 輿地廣記云巴江源出大巴山至當州東南分為三流而中央橫貫勢若巴字通志云清江源出廣元縣前通平鎮歷舊恩陽縣至州與巴江合寰宇記云清水一名白石水即向白石縣之所理也李白巴水歌云巴水急如箭巴船去若飛十日三千里郎行幾歲歸嚴武巴江喜雨詩云連夕霽霓類建瓴送將涼意滿郊垌

江邊萬木大半綠天外一峰無限青却信神龍元解事
豈容旱魃更爭靈從今懷抱如冰釋閉閣燒香伴六經
鄭谷巴江避亂詩云亂來奔走巴江濱愁客多於江徼
人朝醉暮醉雪開霽一枝兩枝梅探春詔書罪已方哀
痛鄉縣徵兵尚苦辛鬢禿又驚逢獻歲眼前渾不見交
親華陽國志漢末劉璋以墊江以上為巴郡江州至
臨江為永寧郡朐胝至固陵為巴東郡而巴遂分矣志
云此居其中為中巴宋洪邁丹梯書院記云今之巴非

昔之巴也本志忠義廟祀漢嚴顏張飛名宦載王濬恐
但沿巴之名然按碑目嚴將軍廟記在巴州城西門內
唐貞元元年韋魯文則祀之亦非一日矣惟嚴武薛逢
為巴州守則今之巴也 杜甫寄馬巴州詩云勲業終

歸馬伏波功曹非復漢蕭何扁舟繫纜沙邊久南國浮
雲水上多獨把魚竿終遠去難隨鳥翼一相過知君未
愛春湖色興在驪駒白玉珂嚴武巴嶺荅杜二見憶云
卧向巴山落月時兩鄉千里夢相思可但步兵偏愛酒

也知光祿最能詩江頭赤葉楓愁客籬外黃花菊對誰
跂馬望君非一度冷猿秋鴈不勝悲鄭谷巴賓旅寓寄
朝中從叔云驚秋思浩然信美向巴天獨倚臨江樹初
聞落日蟬衰榮悲往事漂泊念多年未便甘休去吾宗
盡見憐王周和杜運使巴峽地暖節物與中土異黯然
有感詩云垂柳參差破綠芽此中依約欲飛花春光是
處傷離思何況歸期未有涯其二云始看菊蕊開籬下
又見梅花寄隴頭攬轡巴西官局冷幾憑春酒沃鄉愁

張禕巴州寒食晚眺云東望青天周與秦杏花榆葉故
園春野寺一傾寒食酒晚來風景重愁人任約和巴州
羊刺史韻云鄉關目斷隔咸秦又向巴江度一春可惜
清明好時節看花空憶洛陽人 治內有春風樓秦坦

記云奇峰森列躍入青溪高下眩轉隔閭風雨又有擊
甌樓唐張禕詩駐旌元帥遺風在擊缶高人逸興酣水
轉巴文清溜急山連蒙岫翠光涵宋馮介詩坐上擊甌
清似玉者此也碑目云擊甌樓唐中和四年尚書右丞

相戶部張禕記賦在樓下按擊甌樓賦寔張曙作也序
略云宋玉九辨悼余生之不時也甲申竄身巴南避許
潰師郡刺史甚懼按眷一日登郡南樓下臨巴江饌酒
簇樂以相為娛言間有馬處士攜善擊甌者至請即清
譙爰騁妙絕處士審音以知聲余審樂以知化斯可以
抑揚放淫頡挫匏竹運動節奏出鬼入神太守請余賦
之余曰不圖為樂之至於斯酒酣舐筆乃為賦云爾宋
皇祐初知軍事馬預作記曰為廳壁有唐御史裴禕會

昌四年記宋庶子創建東樓此其事也 碑目云州內

有紫極宮天王堂俱唐大中元年軍事判官進士蕭珣

記有折柳亭宋嘉祐五年太守鄭淵賦折柳詩十絕句

刻石有巴南十七景詩宋知閬州軍蘇欽以閬中望江

南十首記郡景別駕彭永仍賦巴南十七景答之 碑

目又云唐會昌四年巴州刺史裴禕修解宇記巴南新

置屋宇什物石記俱在郡廳 城外東龕在字江東岬

巾子山下即唐兜率寺寺廢碑存 西龕有古墨岩在

懸崖上有壯觀二大字云是李太白筆有流觴亭在西
龕寺碑目云唐乾元戊戌嚴鄭公武所創大厯間盜起
地遂廢開成丙辰刺史唐元封復修葺取羊士諤流盃
十四詠以自序為證又云有嚴侍御暮春五言刻亦在
寺內有唐人題西龕櫻桃其名磨滅按州志城北三十
里鼓樓山之旁有玲瓏山山頂有泉出小石如櫻桃自
然有竅可以穿縷村兒女以為瓔珞名曰櫻桃珠如此
則西龕所詠為石為果未可知也 嚴武題龍日寺西

龕石壁詩云聖澤久潤物皇明常燭幽思從祥風翺德
與和氣遊報國建香刹開靈臨僻州天長面綠水地迥
起朱樓尋異遍衆壑坐禪逢一邱永懷根本妙誓以身
心修奇色豔草滿珍名嘉樹稠遠江崩濤喧複澗微雨
休嘹唳損響谷參差峰入流碧烟曳篁徑白日懸沙洲
泛海謝安石吟詩王子猷揚雄愛清靜山簡多優游性
分固有適著龜何足求神閒孤臺月目送千里舟攜手
逸羣品浩歌邈悠悠山情慕禽尚詩格警曹劉旌能舉

滯時選異拔奇儔鼎食當自致巖棲難久留嗟余參符
守漢主遠分憂往往行春到聞鐘散客愁 朱尹游西
龕詩朝出城南門循溪陟西嶺西嶺鬱岩堯坳隱金僊
境懸崖古墨存白日蛇龍哭嵐霏濕空濛泉澗咽清冷
汲之瀾山茗數啜之魂醒城郭瞰在襟三墩聯九井四
野各嬉煦犬鼠亦無驚豈曰予所能帝德實綱領獲茲
簿書餘怡情對斯景 任約題西龕詩門徑森寒栢小
橋穿竹溪澄江朱檻北晚照碧巖西修竹清泉逗高楠

邃閣齊虛廊面青壁危棧跨丹梯絕頂舒平席遙峰出
半圭軒窻俯星斗襟袖拂雲霓甘露春膏浹濃嵐晝靄迷
嶺猿悲夜嘯谷鳥響晴啼唐寺南龕近巴城東郭低杯
流故池水崖刻古人題酷暑不能到清風如鎮攜何年
脫羈鎖來此養真棲自註今歲甘露降于龕前松柏也
南龕有廣福寺志云唐時建有乾元年間契書碑目
云唐古佛龕石刻在城南二里大書乾元三年山南西
道嚴武奏臣頃牧巴州其州南二里有古佛龕舊有鐫

佛五百餘伏望特賜洪名勅以光福為額唐詩紀事載
嚴武史俊楠木唱和詩碑目云刻在南龕又云郗昂陪
嚴使君暮春五言二首在南龕詩甚典麗又云南龕題
詩石刻在州南二里之廣福寺自唐迄今名公題詠皆
存又云南山記唐中和四年尚書右丞相戶部張祜題
圖經云定僧在南龕上以漆漆其真身龕置石壁不知
何時人惟嚴武奏乞山南寺額表云願度有道行僧永
以往持俾其修習意亦唐以前人也本州志云丹梯書

院在南龕山因其山重疊聳秀有若丹梯而名舊志載
杜甫曾讀書于此而建後經兵燹宋紹興二年知州趙
彥戒重建元季復燬惟古碑尚存唐進士楊興義有和
杜甫詩云莫嫌袍紫歸家阻且慶豐年雅俗安又題秋
風詩云霜風一夜將紅葉換盡江頭萬木青通志云南
龕有雲間閣杜甫寄嚴侍御詩遙知簇鞍馬回首雲間
閣者此也 宋權維重修雲間閣記云閣在南龕絕頂
初自李唐歲久敝壞寺僧請易而新之不閱月間碧

瓦朱甍雕梁畫楯突然聳出于羣山之表暇日置觴倚
檻周覽巖壑萬狀雲烟出沒朝暮變態曾無窮已則昔
之隱狀晦藏而不見者今若神驅而出之皆離潛出幽
吐奇露彩章章于目前也 羊士諤遊南龕詩云物外

真何事幽廊步不窮一登心法在三世影堂空山果青
苔上寒蟬落影中歸來還閉閣棠樹幾春風趙公碩和
郭使君題南龕韻云南龕幾百年古木闕雲崦嵫傾千
仞垂路懸一線險飛狖喜層巔羸驂怯虛塹楓葉紅爛

斑松蓋翠搖颭石皴風雨剝殿古丹青儼拂拭坐空巖
摩挲觀翠琰江勢從何來斗起不以漸憑危意欲飛眺
遠目驚覩鳥鳴山更幽綠淨衣好染烟際漾漁舫風前
亂霜縠縱實有餘歡高懷無一慊尺璧非所寶白圭焉
受玷入蜀真可念得郡亦云忝雖遠長安日猶勝陽山
賤平生足踈曠寧復事拘檢佳時方一來薄日已半晡
雨餘烟草深月墮山樓鑒珍重詩律高詞獲神光閃民
樂樂時康吾憂憂歲歉殷勤謝吳霜歸鬢不堪點相

連有美農臺志云在治南二里相傳昔梁太守桓宣於
此勸農而築今廢址不存 有唐太子賢墓志云在治
南二里高如一小阜唐史高宗上元二年夏四月立雍
王賢為太子永隆元年八月廢為庶人開耀元年冬十
一月徙於巴州中宗嗣聖元年太后殺故太子賢太子
嘗作黃瓜臺辭云種瓜黃臺下瓜熟子離離一摘使瓜
好再摘令瓜稀三摘尚云可四摘抱蔓歸當時有銘其
墓者云斷一指得天下凡人不可為殺愛子竊帝位武后

行之噫嘻賢之遺隧萬世之元龜 北龕志云在北山
一里有白馬泉九州要記云即黃牛山有穴白馬奔出
故名碑目云王望山舊名北山山半石壁隱出老君像
唐人為賦北山老君影迹詩圖經云王望字子濛開元
初嘗與玄宗遇俗傳為晉時人旦跨白驢入長安市暮復
回勝覽云王望山在江之北岸自郡城絕江而登山高
二里許岩徑極險占一郡之勝相傳王真人得道此山
真人名蒙故名王蒙山舊志云唐玄宗控白驪至此山

望見京闕曰此去京師不遠故名王望志云龍洞在王
濛山岩腹間楊羲仲記云左曰東洞門如鑱鑿高幾三
百尺耀若太儀之庭堯率之宮又百餘步則空穴開明
有琉璃洞及釋迦像石犬石鳥凡石之詭形怪狀莫不
畢獻又六七里適後山之根右曰西洞其奇怪亦亞于
東洞楊虞仲遊王望山詩云白雲環其巔流水遶其趾
古木與雲齊偃蹇龍蛇似飛仙渺何許風馭難慕企手
種空流傳歲月尚誰記化鶴空歸來其樹還可指僊凡

隔咫尺世人謬千里丹竈空伏火河車爭挽水學僂僂
益遠槁死空山裏我欲問真訣豈憚航一葦便當捐冠
簪超然謝塵滓僂人拍手笑外物儻來耳 有君子泉
宋黃彛則銘云有冽者泉達於泉南浩然天中其流無
窮于暑而涼于冬而溫豈其矯耶有變者存州志云未
詳所在惟治東四十里廢魯口縣西朝陽巖有之其泉
自巖石流出清冽無比上鐫有君子泉三字宋人來官
多遊于此石刻具存今附錄于後 嘉定壬申夏五月

朔邑令會稽宋拱闕尉錦屏鮮于永清避暑來集拂巖
雲弄泉玉倍有山水之樂所謂意不在酒也 銅梁曹

闕龍馮伯規何孚望古邨李忠父同遊此汎舟酌巖下
日西乃歸淳熙己酉閏月十有二日 巴州都監權縣

尉義渠毛仲子中通江魯口縣巡檢崧峒王願天啟通

江縣尉長安永延年仁叔淳熙八年十月二十一日同

遊朝陽岩 邑宰蓬池何渙之亭通邑尉漢中李元疎

子莊以閏正月下澣日遊魯口故縣基野飲于修篁古

木之下絕江少西息朝陽巖酌君子泉流連至暝而歸
皆乾道九年也 有几水方輿云水形如几奇章縣臨
之志云舊其章縣在州東八十里陸游過奇章僧剎詩
轉盡窮山入翠微松陰拂拂冷侵衣長天秋水自一色
斷岫孤雲空四飛客路何年閒馬足蠡溪平昔負漁磯
僧牕不得吟清晝又擁籃輿到夕暉 有平梁城宋淳
祐都統張實創築取掃平梁州之義也下有平梁洞妙
通居士羅南仲所居有石床石灶按舊城記云平梁山

頂有地數十畝居民數戶在上住種納稅矣志云在州西二十里 有化成縣輿地紀勝化成縣鳳谷山之上有要羊觀熙寧中通守楊黃中記云唐明皇與葉法靜神遊於羊蒙山忽思泰山靈遽以羊進詔于其地立觀今名廣福志云在州西四里唐喬琳巴州化成縣新移文宣王廟頌云殷之系聖周之斯文生我夫子世教之君周微唐興千祀于茲春秋祭菜俎豆其時維巴之南亦揭其宇盧公宰邑人之父母假我升堂陋彼環堵爰

就爽塏長松之下公之志思人亦勤止變此夷俗參乎
孔里學者行之造次于是矣 有恩陽縣碑目云唐貞
元石刻在恩陽縣南渡江登石梯數百級上義陽舊縣
治石梯之側懸崖上有刻字云唐貞元四年十月二十
日再修此路餘皆磨滅不可辨又云大厯初韋應物送
令狐岫宰恩陽詩亦刻石于縣之驛亭 小說撫遺云
古靜州知州王鶚子讀書于義陽山忽一女子前自稱
為張笑桃題紅梅詩于壁墨跡未乾遂不見人疑為梅

仙以山屬平梁故志于此詩云南枝向暖北枝寒一種
春風有兩般頻上高樓莫吹笛大家留取倚欄杆按恩
陽即義陽也詳見通釋 又西北百里有大年縣碑目

云在恩陽縣西北百里有斷碑刻云南隆州大年縣界
十里北集州難江縣界五里縣令李昱立 按曾口奇
章化成恩陽俱梁普通年置大年唐武德置屬集州矣

通江縣

治在古壁州壁州者以城西南壁山為名志云壁山在

縣南一里有嘉祐寺唐節度使鄭畋建至今人呼為鄭公山寺碑目云通江縣一里龍興寺碑唐壁州刺史鄭凝績之父鄭畋作乾符中凝績侍養其父畋于壁也又云壁州山寺記大唐中和歲次癸卯丞相鄭畋撰略云壁山境勝之所鬱密喬樹蔥蒨景態玄月澄日搜索奇秘得泉洞于西南維鑿石架篁繚繞登降高縣旗旛疏為泓沼峭壁危棧遂來商旅乃于舊亭東隅建構佛宇召僧匡信主其事多出私財以益之為堂三間徘徊為

門為廊二十六間高下還合翬飛鱗次廊外為僧房庖
厨數十間又立真室文之高界為左右翼愚與凝績洎
猶子昭允俱寫形于方丈中負山面江雄壓勝地日月
先照風雨所交鐘梵松篁鑑鏘滿聽千家甍棟歷歷在
眼晨煙夕艷輝燦戶庭鷗鷺篙榜以資景物于時行朝
卿士或寄寓于諸州給事中孫君儲秋曹正郎鄭君損
皆柅車此地邀以同筵書琴棋畫隨後間作自仲春至
子維夏也本志又載其碑陰云僕至郡觀舊碑三埋于

戟扉前之泥中遂飾役兵出而滌之其一斷而磨滅者
乃唐鄭公台文修山寺記也始讀之文多訛缺及其完
處令人愛嘆之不已而又得公進退之詳按僖宗紀并
公傳各亦舛畧此公文是可信者矣惜其湮沒遂命筆
正訛補缺離句綴意解凡六十七字斬石命僧守丕書
之刻而立於州學庶幾永永記成于唐中和甲辰孟秋
二十有三日重刻于大宋之嘉祐癸卯孟秋中澣凡三
甲子云太常博士俞斌君玉序按此則嘉祐寺以重修

得名者原名為龍興也 本志又載鄭相遺踪在壁山

下石澗中梯石齒披煙蘿入幽巖苔蘚間有字云檢校
司徒守太子太保鄭畋門吏給事中賜紫金飛魚袋孫
儲尚書刑部郎中賜紫金緋魚袋鄭損中和三年十二
月八日收訪泉石偶題于此僧匡信看題傍又刻有畋
明年孟秋念七日與姪昭允至此訪別一段是其碎金
斷壁尚有可尋者 碑目云薛使君布政碑唐乾符年
間壁州刺史裴寘辭作乾符間立又云壁州神廟石刻

在今通江縣北四十步有元光三年制書本志云玄妙
觀右星精石唐人刻篆甚多民間琢毀其半俱在治內
唐推官鄭損星精亭詩云星沉萬古痕孤絕勢無隣地
窄少留竹空多剩占雲釣篷和雨看樵斧帶霜聞莫惜
尋常到清風不負人 方輿云歌籟山與壁山相對上
有石鼓聲聞數里連擊即雨通志云通江縣南有秋錦山
隔江望之如錦與壁山相連也 壁山上有玉鞭池志
云昔有人拾玉鞭于此池內因名按朱慶餘送壁州劉

使君詩江分入峽路山見採鞭人即詠此事有鳴鹿祠
五代史王建為壁州刺史後僭位永平三年麟見于壁
山二鹿隨之此立祠之始也宋皇祐初太守胡俛記其
事云朝廷有大詔令官屬有遷罷鹿必鳴鳴于山陽為
福鳴于山陰為禍靈驗如符山下枕諾水諾水即宕水
所激聲若呼諾後魏諾水縣以此得名也 志云縣東
南隅有公山隅江形如公字舊傳張道陵七世孫刺集
州于此上昇絕頂有張康侯廟 舊志載孫思邈濯藥

于縣東十里石澗之畔名為孫氏池亭石灶丹白尚存
按碑目云孫氏園在通江縣二十里龍灘之側唐末監
察御史盧重阜與壁州刺史辛巢父等六人分詠賦詩
有石刻存宋米仲賢孫氏池亭詩云密林抱清溪微徑
入煙靄亂流縈石轉浩浩蕪萬派披蘿出潭上結字在
竹外坐嘯孤雲還開軒遙相待奔崖臨絕壑幽趣驚眈
眈渟滿泄其餘下注陰壑瀨道情留霜簡詩興延皂蓋
賞逐景物偏心期臨仙槩日低迴岡後鳥入寒林內暝

色交殘光明滅羣木態後之視今日猶今視千載永懷
滄洲人功成身將退符陽縣令陸干城和云斷崖青松
林林下覆煙草一徑捫綠蘿數里尋芳藻巖開野人屋
結構憑孤島石斷寒泉流亭幽翠巘繞攬挈龍虎狀宛
若鬼神造隔崖聞湍聲當牕見夕照巴南絕境處勝似
東溪好萬籟清心胸孤雲豁煩惱樽邀驄馬客寫物窮
探討琴匣閒時開柴門不須鎖孰云造化工永與天地
保長揖謝王侯塵紛徒浩渺 本志又云西十里有古

佛龕唐人題詠風雨剝蝕惟一碑粗可識乃龍朔中壁州參軍蔡洪勅又一碑乃阿彌陀佛龕也縣之洞有

二一日龍洞志云在西二百里吳埡鄉洞周圍二十餘丈高三丈深七尺內有池殿清瑩湛然一日蛇洞志云在北四百里南壩寺唐建也每歲端陽前後有蛇自柱礎間出沿階滿室大小顏色非一種然不為害昔人傳三萬四千尾不可數也按此即巴蛇洞云 礧有二一日仙人礧志云在東三百里有石竇可容百人崖上刻

公孫秀才讀書處年代不可攷有山茶高數丈相傳是
唐時樹一曰牛角礮志云在縣西三百里金溪有石室
可容千人石笋數十自崖頂下綴望之稜稜如牛角俗
呼為牛角礮按說文礮礪石也此以形似得名 古墓
有二一曰吳將軍甘寧墓志云在縣西百里通志云在
通江縣西露浴溪上謂之甘谷一曰向侁墓志云東六
十里大鐘山獨起萬山中如覆鐘其下即向侁墓左龍
池山峭立挿漢蒼松偃蹇有石池龍湫注之 古城關

二一曰得漢城縣志云東北百里萬山中崛起塹崖四面峭絕獨西南二徑凌險轉折而上誠一夫當關之勢斷崖多前代遺踪可識舊志載漢高帝據此以通餉道石壁刻云宋淳祐己酉季冬大使余學士親臨得漢城山視其形勢而授都統制張實躬率將士因險形壘儲糧建邑為恢復舊疆之規分任責者總管王昌金之福鈐路張虎臣司整杜淮王安杜時順徐斯李成劉文德劉清梁福陳寶賀山進李崇制領郭俊杜成周仙周

一曰桐栢關志云在東北八十里與樛林關相對有關
侯廟相傳神魯守此畊者往往得箭鏃

南江縣

寰宇記云南江縣後周天和五年置以江水難涉為名
通志云國初始易為南江也南江出米倉山經當縣前
下與巴江合 碑目云唐難江公山威惠廟記天寶改
元田彥識撰神乃漢張魯後又云唐李繼顏誥詞刻于
郡廳光化三年中書舍人錢珣行撰有城牙樓記圖經

以為李楫文有舊碑二其一偽蜀廣政己未之記其一
天聖乙丑之記 碑目又云集州兩角山記唐集州刺

史楊師謀書今在難江縣志云南三里孤雲兩角二山
王子韶詩孤雲兩角去天一握有石刻蕭何追韓信處
下有溪是名韓溪按孤雲兩角山及截賢嶺俱在棧道
去縣二百餘里其碑刻則移近縣耳又有宋集州刺史
張龜年回車院記道士蒲善從勒石 縣之勝者有潭
曰放生石刻放生潭三字水落方見意亦唐刻也其上

鐫七佛龕圖經云乃唐張禕扈從僖宗入蜀時經此所
鐫有峽曰石鼓碑目云趙寅為集州刺史有石鼓峽
記在難江縣有石曰探梅志云縣東北五里探梅石
亂石中有刻云宋人少華陳祉介卿浚儀潘士政執禮
厭次來高元敷攜樽探梅靖康丙午閏四月幾望有
渡曰莎鼻碑目云在難江縣有唐集州刺史蘇味道題
字有灘曰洋灘志云縣北洋灘楊侍郎墓碑字多蝕
碑座是菜玉見存但不知何代人 有澗曰菖蒲碑目

云菖蒲澗記唐開成四年集州刺史蘇味道題跡志云
菖蒲澗在縣北一里懸崖峻壁石室空曠有唐宋諸賢
石刻云自潭北入澗行經此新開路東不啻三百步其
間巨石疊倚嘉木交映空森復嶭奇勢異狀綠苔青蒲
印模履踪捫手探足無非蒼翠幽禽皓皓飛泉渥渥若
有異人仙客鼓瑟吹簫于洞穴之中使人心逸神暢悅
然忘歸斯實方外之佳賞也噫自有此澗杳無人蹤豈
異夫浮世之事通塞有時耶今鑿崖為路梯石為徑連

延抵于碧崖盤石之東究其澗分之所開成四年十月二十三日武功男子記僧宏真尋澗之迹藏諸山房

古碑刻云有宋改元政和清明後一日權縣事長安杜德機元發訪菖蒲之溪薄尋其源言採其藥轉步而返則振衣碧巖屏石而坐解帶古床幄雲而息然後歸頗恨得此之晚 大宋改元政和辛卯歲仲春月清明日

縣吏馮子茂典職長楊子山邀同局中李二都王四都楊工四沿澗究菖蒲碑文兩日方返故題于碧巖三月

十四日楊嵩岳山書記 廣都蔣城吳大年古郾李椿
秦亭權師雄大梁趙恂閭中馮時周谷米居約以紹興十
八年九月十有四日訪古菖蒲澗觀唐人武功子石刻
置酒碧巖溪效柳子序飲損其籌為一題名投之澗或
洄或止或沉皆賞惟直前無汙滯則免坐客率三四十
飲咲歌諧嬉日晡乃罷畢成記 紹興庚辰上巳游菖
蒲澗飲于碧巖效晉人褰袂故事潁昌王芹宕渠韓慶
孫開封喬嘉成都周瑞行男夏卿凡五人 李異李國

用楊義仲勾成允唐棟淳熙甲辰正月晦來遊時春日
融明熏風和暢為蘭亭之飲以歸 嘉定壬申仲春三
城郭仲深攝事集山清明後一日遊菖蒲澗扳尋古壘
眉山扈才叔小益劉溫叔潼上楊珍父同來 有山曰
十二峰方輿勝覽云十二峰在難江縣四十里馬盤灣
巉巖聳秀最為奇觀有客題詩曰挿立翠屏峰十二為
君喚作小巫山 有水曰明水寰宇記云明水在難江
縣北五十餘里水出硯屏林木山川之形隱于石間

有古城曰平梁志云平梁城遺址在縣西三百里上有
古寺龍池淳祐間都統制張實遵大使余龍學指授規
畫率諸軍剏平梁山城云取掃平梁州之義坐據要地
壁立萬仞天人助順漢中在掌握矣刻于石 有橋曰
五馬志云李虎仙者往來難江通江二縣縣人修五馬
橋工匠數十虎仙于皮袋中出小釜可容三升以米麪
食物納其中炊之以飼人人皆飽 有寺曰栢院志云
縣南六十里栢院寺唐高宗末年建相傳為章懷太子

修行之所有碑文剝蝕 有宮曰紫微志云唐賈真人
居難江縣之紫微宮白晝登仙留詩壁間云此後不知
誰有分壁間留得上天梯 有觀曰銅人志云縣南隅
江銅人觀唐開元集州刺史李成裕奏設肖像皆銅初
名紫極宮有殘碑數行開元二年兵部尚書牛仙客文
宋集州守楊方平重立石又有碑刻載黃蓬石事畧云
黃蓬石乃大蓬之仙者性顓蒙唯充薪水偶汲于寺見
金瓶貯水乃飲水而置瓶是夕勞困卧藩籬間醒忽顓

悟能詩達之名士無能出其右者項乃隱于大蓬人不
之見 按玉堂閒話云興元之南有大竹路通于巴州
其路則深谿峭巖捫蘿摸石一上三日而達于山頂行
人止宿則以絙蔓繫腰縈樹而寢不然則墮于深澗若
沈黃泉也復登措大嶺蓋有稍平處徐步而進若儒之
布武也其絕頂謂之孤雲兩角彼中諺云孤雲兩角去
天一握淮陰侯廟在焉昔漢祖不用韓信信遁歸西楚
蕭相國追之及于茲山故立廟貌王仁裕嘗佐褒梁帥

王恩同南伐巴人往返登陟留題于淮陰祠曰一握寒
天古木深路人猶說漢淮陰孤雲不掩興亡策兩角曾
懸去住心不是冕旒輕布素豈勞丞相遠追尋當時若
放還西楚尺寸中華未可侵若其崎嶇險峻之狀未可
殫言也

蜀中廣記卷二十五

欽定四庫全書

蜀中廣記卷二十六

明 曹學佺 撰

名勝記第二十六

川北道

保寧府三

劍州

漢陽山州之主山也武功康海德涵劍州重陽亭記所

云潁枕聞溪前對漢陽是矣 碑目云劍州石柱文晉太
元十八年刻東園聞泉賦唐貞元中蘓洪之刻開元寺
重修中和極樂院銘大順三年劉崇望記宣詔亭碑蜀
天成四年四月一日記宋高宗籍田手詔碑皆治內之
琳琅也 碑目重陽亭大中八年太守蔣公侑始建李
商隱序而銘之石刻在郡東山之陽志云東南一里東
山又名鶴鳴山上有磨崖顏書元結中興頌蔣侑重陽
亭在焉李義山記略侯講天子意三年大理乃大鏟險

道緄石見土其平可容考工車四軌建為南北亭以便
勞餞又亭東山號曰重陽以醉風日南北經貫若出平
地無有噫嘻侯姓蔣氏名侑銘曰仁之為道隆磊英傑
天簡其勞羨以事物惟君之缺撮取不窮有如武庫蔣
之有世以仁為歸伯氏之宜仲氏之思厥弟承之繩而
不紂以令為侯天子之德汝侯為理劒有盈景君南臣
北父坐子伏飲牛漚管田訟以直市正獄清謁歸告休
朝雨滂滂濕其幃頭民樂以康願有顯庸侯作南亭北

亭是雙至于東山乃三其功推險為夷大石是砭亦既
三年民走乞留伯氏南梁重弓二矛古有魯衛惟我之
曹惟仁之歸有世在下其攄其超尾馬鬣馬惟蔣之融
由唐龐叟惟是亭銘得其麤且大中八年九月一日太
學博士河內李商隱撰 宋閬州通判吳師孟記略東
山一峰特竦千仞衆小山迤邐卑附如奔走如侍從茂
林蒼岨煙靄蒙密有一亭馬冠於山椒碧瓦鱗差朱欄
霞明長溪清潄流影不去乃唐刺史蔣侑所建重陽亭

李商隱序而銘之者也權知州軍郭子臯題其碑後曰
李義山記重陽亭曰作亭東山以醉風日而不記名亭
之因子讀張平子西京賦有云集重陽之清澄釋云上
為陽下為陰清澄亦為陰則斯亭也上據高巘下瞰澄溪
蔣公名亭之意其得之於此耶釋碑以告來者元豐六
年題又康德涵記以為亭畔有石刻古重陽亭四字宋
張琬筆 按東山即卧龍山寰宇記卧龍山在縣東二
里盤園州市高百丈其上為九龍山高三百丈唐天寶

六年敕改龍祠山山上曾置九龍祠也 州北為故壘

山益州記云山有姜維拒鍾會故壘其山峭壁俯臨絕

澗 又二十里即劔門關棧閣相望顏師古曰棧即閣

也按史記蔡澤謂范雎曰今君相秦計不下席坐制諸

侯棧道千里通于蜀漢華陽國志云諸葛亮相蜀鑿石

架空始為飛閣以通行道如此則棧閣為二矣蜀漢以

前曰石牛道史記秦欲伐蜀而不知道乃作五石牛以

金置尾下言能糞金以遺蜀蜀王負力而貪使五丁開

道引之秦因使張儀司馬錯尋路滅蜀 唐李遠五丁

力士開蜀門賦云在昔褒斜未通荒楚異域物產難究
封疆罕測秦王將欲廣其南寇其北張儀因度其勢量
其力假牛之計斯設饋女之功是克蜀王乃命力士闢
高山貪功饕餮忘情險難捫峰巒於日側扶虺蜮於雲
間將以砥嶰嶂等躋攀俄而白日蕩搖玄天忽霍鬼哭
神怨風號霧廓怒髮森植雄心震躍灑珠汗以電散瞪
星眸而電落將欲斷煙靄排崑崙謂巨靈之所拓蹂重

林迴絕壑疑夏后之所鑿吁可畏哉江標峻棧之形呀然地裂闕闢高峰之色驕若天開已而後患方啓前心莫遂道路無阻關梁鮮備五丁死而蠻黨移一逕通而秦人至也輿地廣記曰石牛道者山有小石門穿山通道六丈餘漢永平中司隸楊厥又鑿而廣之諸葛孔明以大劔至此有隘束之稱乃立劔門縣復于閣道置尉以守之常璩云閣道三十里至險有閣尉桑下兵民也晉書李特入蜀至劔閣顧盼險阻曰劉禪有此地而

面縛于人豈非庸才耶 隋置閣之地皆有關官而于
劔閣獨未置關至唐始置劔門關後又置大劔戍小劔
戍五代董璋遣兵扼劔門關又為七砦按圖經云關官
許令直受頒降詔赦亦許直行申發文字聖節月旦亦
有表疏異時訓飭關吏至親洒宸翰所以重設險也

周地圖云大劔山亦曰梁山山海經高梁之山其上多
堊其下多砥礪其木多桃枝鉤端有草馬狀如葵而赤
華實白跗可以走馬王隱晉書張載隨父收入蜀作劔閣

銘益州刺史張敏見其文乃表天子刻石於劔閣焉又
有小劔山在西北三十里故此為大劔崔鴻十六國春
秋苻堅使楊安伐蜀其將徐成破二劔是也東連莎鼻
西接綿州凡二百三十一里故左太沖云緣以劔閣矣
碑目云劔閣有魏太尉鄧公神廟記唐劔州刺史邢
丹題又鄧衛聖侯碑唐刺史郭淮立石又有唐李復撰
劔閣碑唐魯叔明劔門記貞元二年張允書唐劔門制
置記廣明元年立俱在棄繻亭南百步 寰宇記云隋

始州銘在劔門縣二十里許有古州基自縣至彼攀木緣壁至此稍平一豐碑字名磨滅開皇三年李德林文土人謂之劔門縣蓋隋時以此為始州也唐書元和元年令狐楚賀收劔門表云臣得上都進奏院官高振報嚴礪下告捷官嚴公貺奏正月二十三日收復劔門破賊五千斬偽授劔州刺史武德昭訖碑目云唐韋表微劔閣銘在報國寺靈泉側昔唐僖宗巡幸至此有微恙飲其泉頓愈因名為報國靈泉今有石刻存焉

又云唐清義何氏古碑在劍門縣登高臺光宅中建所
載有名幕者生四子孝弟義遜家八十口不異居儀鳳
二年敕賜清義門 又云劍門有修關石刻天成五年
立又有五代敕牒甚多皆天成長興廣政間刻 方輿
勝覽云有玉女臺在大劍絕頂峭壁千仞下瞰古道行
人如蟻有小石刻云玉女煉丹之所 又有仙女觀圖
經云在北崖頂唐先天二年置去觀一里渡仙女橋有
煉丹臺岩畔有仙女影近代以來改為禪院 有誌公

殿劉竢記云劒閣之下有壽聖寺在石壁之西偏由益昌道中望之隱隱如行僧頂伽帽每秋時出或見光景陸游劒南詩藁云劒門東石壁間影有若僧負杖者杖端彷彿有刀尺拂子狀有梁山寺產茶亦為蜀中奇品東坡南行錄詩有飛簷如劒寺之句其註云出劒門東望有一寺山巔樓閣隱隱可見有一二碑皆磨滅政唐碑也 有龍宮洞穴幽邃雨雪壘小說云王建為盜朝廷捕之急逃於劒門巨石穴中即此洞口宋人隸書

龍岩二字 有思賢樓在水門上畫張孟陽李太白杜

子美柳子厚像 有文煥堂本記云按劔門題詩以太

白子美為重而世未有並祠之者會從李參預壁所得

所賜阜陵御書蜀道難又從李左史得趙忠定汝愚大

書劔門詩因建祠刻二詩于側榜其堂曰文煥取韓退

之詩語也 按晉張載劔閣銘云巖巖梁山積石峩峩

遠屬荆衡近綴岷嶓南通邛僰北達褒斜狹過彭碣高

踰嵩華惟蜀之門作固作鎮是曰劔閣壁立千仞窮地

之險極路之峻世濁則逆道清斯順閉由往漢開自有
晉秦得百二并吞諸侯齊得十二田生獻籌矧茲狹隘
土之外區一人荷戟萬夫趑趄形勝之地匪親勿居昔
在武侯中流而喜山河之固見屈吳起興實在德險亦難
恃洞庭孟門二國不祀自古迄今天命不易憑阻作昏
鮮不敗績公孫既沒劉氏銜璧覆車之軌無或重跡勒
銘山阿敢告梁益 柳宗元劔閣銘曰井絡坤垠時以
饒足喋血誓士玄機在握分命貔貅陳為犄角右逾岨

山左直劔門攻出九地上披重雲攀天蹈空夷視阻艱
破裂層壘殄殲羣頑內獲固圉外臨平原天兵徐驅卒
乘譁譁大憖囚戮戎夏咸歡帝圖厥功惟梁是先開國
進位南服于藩邦之清夷人以完安銘功鑒亂永代是
觀 歐陽詹劔門棧道銘云天覆地燾本亦備設大象
難全或漏或闕損多益寡聖賢代工被雖有闕與無闕
同惟北曰秦惟南則蜀地闕其間紳維不續斗起斷岸
屹為兩區秦人路絕蜀火煙孤天實不通賢斯有造鑽

堅剡勁無蹊以道若川匪舟若陸非車緣危轉虛步驟
交如構雖在功存亦由德項佛劉怒從完以踣隋落我
榮自顛而植地非革勢材不易林踣植之致惠怨之心
勿謂斯道不常勿謂斯道可久禮不以禮可有而無恭
不以恭可無而有創之之意如彼固之之理若茲彼知
不易茲而易知勒銘道左其同我思 李文饒集劒門
銘註云劒門當中有一岑峻嶺橫峙望若蕭屏此一峰最
奇而說者未嘗及也故銘云羣山西來波積雲屯地險

所會斯為蜀門層岑峻壁森若戈戟萬壑奔東雙飛高
闕翠嶺中橫黯然黛色樹若雄屏以衛王國 梁張惇

蜀道難詩云梁山鎮地險積石阻雲端深谷下寥廓層
巖上鬱盤飛梁駕絕嶺棧道接危巒攬轡獨長息方知
斯路難唐玄宗狩言歸駐蹕劔門詩云劔閣橫空峻
鸞輿出狩回翠屏千仞合丹嶂五丁開灌木縈旗轉仙
雲拂馬來乘時方在德嗟爾勒銘才王勃普安建陰題
壁云江漢深無極梁岷不可攀山川雲霧裏遊子幾時

還盧照隣大劔送別劉右史云金碧禺山遠關梁蜀道
難相逢屬晚歲相送動征鞍地咽綿川冷雲凝劔閣寒
倘逢忠孝所為道憶長安李頎送張諲入蜀云出門便
為客惘然悲徒御四海維一身茫茫欲何去經山復歷
水百恨將千慮劔閣望梁州是君斷腸處孤雲傷客心
落日感君深夢裏蒹葭渚天邊橘柚林蜀江流不測蜀
路險難尋木有相思號猿多愁苦音莫向禺山隱禺山地
非近故鄉可歸來眼見芳菲盡岑參入劔門寄杜楊二

郎中云不知造化初此山誰開坼雙嵯倚天立萬仞從
地劈雲飛不到頂鳥去難過壁速駕畏巖傾單行愁路
窄平明地仍黑亭午日暫赤凜凜三伏寒巉巉五丁迹
與時忽開閉作固或順逆磅礴跨岷峨巍蟠限蠻貊星
當觜參分地處西南僻陡覺煙景殊杳將華夏隔劉氏
昔顛覆公孫曾敗績始知德不修恃此險何益相公總
師旅遠近罷金革杜母來何遲蜀人應更惜暫回丹青
慮少用開濟策二友華省郎俱為幕中客良籌佐戎律

精理皆碩畫高文出詩騷興學窮討蹟聖朝無外戶寰
宇被德澤四海今一家徒然劒門石杜甫劒門詩云惟
天有設險劒門天下壯連山抱西南石角皆北向兩崖
崇墉倚刻畫城郭狀一夫怒臨關百萬未可傍珠玉走
中原岷峨氣淒愴三皇五帝前雞犬各相放後王尚柔
遠職貢道已喪至今英雄人高視見霸王并吞與割據
極力不相讓吾將罪真宰意欲鏟疊嶂恐此復偶然臨
風默惆悵王維送崔五太守云長安廐吏來到門朱文

露網動行軒黃花縣西九折坂玉樹宮南五丈原褒斜
谷中不容幘唯有白雲當露冕子午山裏杜鵑啼嘉陵
水頭行客飯劒門忽斷蜀川開萬井雙流滿眼來露中
遠樹刀州出天際澄江巴字迴使君年紀三十餘少年
白晢專城居欲持畫省郎官筆回與臨邛父老書李白
蜀道難云噫吁戲危乎高哉蜀道之難難于上青天蠶
叢及魚鳧開國何茫然爾來四萬八千歲不與秦塞通人
烟西當太白有鳥道可以橫絕峨眉巔地崩山摧壯士

死然後天梯石棧相鉤連上有六龍回日之高標下有
衝波逆折之迴川黃鶴之飛尚不得過猿猱欲度愁攀
緣青泥何盤盤百步九折縈巖巒捫參歷井仰脇息以
手撫膺坐長嘆問君西遊何時還畏途巖巖不可攀但
見悲鳥號古木雄飛雌從繞林間又聞子規啼夜月愁
空山蜀道之難難于上青天使人聽此凋朱顏連峰去
天不盈尺枯松倒挂倚絕壁飛湍瀑流爭喧豨奔崖轉石
萬壑雷其險也如此嗟爾遠道之人胡為乎來哉劍閣

崢嶸而崔嵬一夫當關萬夫莫開所守或匪親化為狼
與豺朝避猛虎夕避長蛇磨牙吮血殺人如麻錦城雖
云樂不如早還家蜀道之難難于上青天側身西望長
咨嗟孫逖送靳十五侍御使蜀云天使出霜臺行人擇
吏才傳車春色送離興夕陽催驛遠巴江轉關迎劔道
開西南一何幸前後二龍來張喬送蜀客云劔閣緣空
去西南第幾州丹霄行客語明月杜鵑愁露帶山花落
雲隨野水流相如曾醉地莫滯少年遊李端送鄭宥入

蜀迎覲云寧親西陟險君去異王陽在世誰非客還家
即是鄉劒門千轉盡巴字一支長請語愁猿道無煩促
淚行李德裕題劒門云奇峰百仞懸清眺出嵐烟迥若
戈回日高疑劒倚天參差霞壁聳合沓翠屏連想是三
刀夢森然在目前戎旻入劒門云劒門兵革後萬事盡
堪悲鳥鼠無巢穴兒童話別離山川同昔日荆棘是今
時征戰何年定家家有畫旗許棠送張員外西川從事
云為郎不入朝自是赴嘉招笏角初離首金章已在腰

劒橫陰綠野，棧響近丹霄。迎驛應相續，懸愁去路遙。顧
非熊送李，廊侍御赴劒南。云鳥道見狼烟，元戎正急賢。
圖書借朋友，吟詠入戈鋌。山色城池近，江聲鼓角連。不
應誇戰勝，知在檄蠻篇。李商隱題劒門寄上西蜀司徒
杜公云：峭壁橫空限一隅，劃開元氣建洪樞。梯航百貨
通邦計，鍵閉諸蠻屏。帝都西蹙犬戎威，北狄南吞荆郢
制。東吳千年管鑰誰，銘範只自先天造化爐。楊凝送客
入蜀云：劒閣迢迢夢想間，行人歸路繞梁山。明朝騎馬

搖鞭去秋雨槐花子午關于邵送穆司法赴劔亭序云
決曹掾穆侯理行歸于劔十月寒矣艱哉是行休於嘉
陵之陽日與樵牧為伍而吾子言涉江水至於室廬告
輶之期不遠千里然則取諸羽翮擊彼風水時之來也
鳴可驚人而愛親之道敬養為切安得擇仕而以三語
為屈哉東江劔門又足助興地氣初閉河風稍嚴青冥
為空黃落向盡感物論別者庶存乎歌詩其二云人謂
穆子通於理者也褒然作掾榮問所致故隴之下清風

可挹人能盡驩邵真知勉矣頃以令弟仕于劔太夫人
就養適乎遠雖迫王事心馳倚閣朝辭府庭夕次郊郭
不俟高駕拂衣而南羣公錫類詎敢留心各以壺酒垂
楊好陰金秋始交火雲猶赫指日獻壽在原增光送君遂
行千萬無盡也 劍門東南有七盤嶺呂山曲折而七

盤也方輿云武連縣在七盤山上按武連縣舊為武功
縣故郭璞識云縣路翠武功貴縣路青武功榮其後青
城何琰宰是邑遂刻石于縣門志云逍遙樓廢址在武

連舊縣唐顏真卿書扁三大字碑刻在馬元改武連縣
學為魏公書院以唐魏徵所生之地也學正王惠為之
記 有靈泉劔南詩藁云過武連縣安國院有二泉傳
云唐僖宗幸蜀至此飲之而甘賜名靈泉其詩云滴瀝
珠璣翠壁間異時曾得奉龍顏即此 有都竹水寰宇
記都竹水從武連縣流入普安縣南流至掌天山下入
閬州益州記云掌天山在臨津縣山多柘堪為良弓雖
縻絲燕角不能勝也志云柘溪水出柘谷山多生柘木

有下辯城寰宇記廢下辯城即臨小潼水李膺益州
記云宋元嘉二十九年以武都流人于下辯縣安置大
明二年改為武連縣寰宇記小潼津發源京兆山分水
嶺謂之京兆水也 本志云武連縣九龍山有洞石壁
如屋內有九井 又云羣仙洞在武連縣洞中無他物
惟石窟數間如堂宇有水自西向東不知所來山下長
老云曾有數人耘苗見洞中聲樂嘹亮密覘於洞口見
列坐如天人狀奏樂者無數欲進前觀之即不見自後

人數見焉因名為羣仙洞按武連下辯二縣皆因秦人
僑置者 劔之西南有黃安縣晉置宋改為普成縣縣
在跨鶴山一名駕空山山腹有紫霄觀崖上有僧懷素
草書多缺落不可辨跋云右懷素草字絳臺潘氏載入
法帖誤綴張長史書末今潘氏墨本不可多得因刊于
駕空山崖石與伯英草聖並列共傳永久隆興元年癸
未季冬濃洄野叟識 志云城南百二十里有漢王潭
在黃安縣之東境上有漢王廟 又云普成縣南一里

紫霄觀舊名普成晉宋間有李隱君名普成者煉形其間與其弟普露普濟白日昇去是普成縣以仙名也縣傍有石麒麟每天旱土人諷經取水洗之即雨 又南八十里有義津即古臨津縣地碑目唐盧照鄰悟本寺記在故臨津縣悟本寺內

梓潼縣

水經曰梓潼水出其縣北界西南入于涪註云故廣漢郡也公孫述改為梓潼郡昭烈嘉霍峻守葭萌之功又

分廣漢以北別為梓潼郡以峻為守馬王勃梓潼南江
泛舟序云咸亨二年六月癸巳梓潼縣令韋君以清湛
幽凝鎮流靖俗境內無事艤舟於江潭縱觀於邱壑渺
然有山林陂澤之思遂長懷悠想周覽極睇思其人則
呂望藉茅於磻溪之陰屈平製芰於涪陽之浦覺瀛洲
方丈森然在目於是間以投壺讐以妙論亦有嘉餽肯
酒鳴絃朗笛以補尋幽之致焉預於斯者若干人 唐
書天寶之亂左拾遺房琯獨馳蜀路至普安郡謁見玄

宗與語大悅之即日拜吏部尚書門下平章事復次梓潼寰宇記云明皇過梓潼望見山上有一窟近臣奏云漢司馬相如讀書之窟遂勅名為長卿山志云山上
有長卿寺下有漢侍御史李業石闕舊經云前漢侍御史李業葬此遭赤眉亂二闕以臨關俱破壞志又云縣東北有二石闕其一題曰漢沛國相范伯友墓其一題曰漢趙相國雍輔君之墓宋周必大曰予得光武時梓潼扈君墓輒先叙所歷之官末云千秋之闕模脫隸

書而非鐫也

搜神記云有神姓張名亞道術顯著廟

在梓潼玄宗幸蜀著靈追封左丞相唐書廣明二年僖
宗幸蜀神又見于利州桔栢津封為濟順王親幸其廟
解劔以贈神也郡國志云濟順王本張亞子戰死而廟
存昔亞子西至長安見姚萇謂曰却後九年君當入蜀
若至梓潼七曲山幸當見尋至建元十二年萇隨楊安
南伐將至七曲迷道遊騎賈君蒙忽見一鹿馳去遂至
廟門鹿自死追騎共剝之有項萇至悟曰此是張君為

我設主客之禮烹食而去按此即世所奉祀梓潼帝君也唐判度支蕭遇和王鐸作張亞子廟詩云青骨祀吳誰讓德紫華居越亦知名未聞一劍傳唐主長擁千山作蜀城斬馬威稜應掃蕩截蛟鋒刀俟昇平鄼侯為國新簫鼓堂上神籌更布兵文同丹淵集出守陵州有祭梓潼神文梓潼又有百神廟在縣南四里咸通十一年盧耽除西川節度時蠻寇圍成都大將軍吳行魯統師過此見斷碑皆古卿相之名默致禱焉既而王師大

捷乾符三年行魯除東川節度遂於路側置百神之廟
景福大順間廟遭兵火王氏僭號夢神人求祠宇稱是
梓潼百神因重興置 又有五婦山在縣北十二里高
四百二十丈按蜀記云梓潼縣有五婦山秦王遺蜀王
美女五人蜀王遣五丁迎女至梓潼五丁蹶地大呼驚
五女並化為石蜀王築臺而望之不來因名為五婦候
臺漢書地理志云梓潼五婦山碑誌存有五婦神廟李
膺又云梓潼有鳴湍折碑祠西臨潼水湍迅激流俗呼

張湍祠亦呼為石碑祠 又有隱劍泉在五丁力士廟

西一十步古老云五丁開劍路迎秦女拔蛇山摧五丁
與秦女俱斃於此餘劍隱在路傍忽生一泉又云此劍
每庚申日現 又有蛟龍神祠在縣東十九里兜鍪山
上俗呼為兜鍪神古老相傳此神昔用生人祭之不則
瘡疾水潦為害張道陵戒之遂絕 又有葛山志云梓

潼縣西南二十里葛山又名卧龍相傳武侯伐魏駐兵
於此見虎豹蛇虫勢惡自卧草中獸皆俯伏有古碑在

此山之景福院

蜀中廣記卷二十六

欽定四庫全書

蜀中廣記卷二十七

明 曹學佺 撰

名勝記第二十七

川北道

順慶府一

南充縣附郭

嘉陵江既逶當郡流則將匯巴宕之水而下墊江矣華陽國志云劉璋分墊江以上為巴西郡者此也寰宇記

云嘉陵江在州東二百步自相如縣界流入南充按十
道記云果州左濱西漢水叢薄蔚然有相如琴臺觀此
則嘉陵江之為西漢水益明矣 常應物聽嘉陵江水
寄深上人詩水性自云靜石中本無聲如何兩相激電
轉空山驚按長慶集云常貫之坐考策收直言者出為
果州刺史今嘉陵驛設于此 耆舊錄云自漢紀信以
下三十六人並見學錄蒲士龍所編耆舊而趙嗣業趙
昌藻游問為之贊此外隱逸王公宇以下十四人併繪

像于郡之鄉賢堂又復搜訪王綰以下二十餘士悉繫于左 郡志云譙周墓在治後有碑今折 碑目云唐王維送楊長史赴果州詩刻在郡治其中聯云官橋祭酒客山木女郎祠唐詩三體注云漢法祭酒上客之稱女郎祠以謝自然上昇于果山按常璩云張魯以鬼道立教後乃為祭酒巴漢夷民多便之則祭酒稱上客是矣謝自然昇仙乃貞元間事在右丞後不應引此官橋者志云郡西三十五里有西橋舊名官橋也按女郎亦

張魯女感孕而生龍者祠在漢中

碑目又云唐移縣

碑在南充縣門大中年立文字磨滅不可詳辨二良牧
碑馬肩孟撰載唐二刺史事碑在郡治醋庫之側永興
節度使王彥超重建行成思堂石刻詩不著其姓今附
見云作堂在姑孰把麾來果山男子四方志萬里如目
前振振佳公子性行純如天既知仁有本自應枝葉繁
宣尼語參考推廣十八篇君能擴充之九思極其全道
行身亦立揚名顯其先回觀廬墓人卑卑何足言方輿

記云有仙鶴樓在郡城後子城上下瞰大江宋邵博詩
春去秋來好風月鶴樓端勝庾公樓 郡之東南有開
漢樓郡守楊濟記云聖朝褒綸有實開漢業之語因摘
二字以名是樓按開漢樓詩序嘉陵大江襟帶於左金
泉栖樂諸山雄峙於右宋忠祐廟誥詞云以忠殉國代
君任惠實開漢業使後世知君為重身為輕雖糜捐不
避者侯有力馬之謂也 有清居山勝覽云在南充縣
南唐姚昂詩天設兩峰南北峭地盤一水古今流內有

四亭曰白雲光相吸江五友按五友亭宋游炳題明月清風為道友古典今文為義友孤雲野鶴為自在友惟石流水為娛樂友山果芋栗為相保友是五友者無須更不在此間也總志云金樓在清居山高與山等亭亭如浮圖常有光焰出焉 有清泉山方輿云城南十里

有古剎下瞰龍門諸山寰宇記云龍城山盤屈若龍絕壁如城蜀志補遺即龍角山道經以為福地 有朱鳳山寰宇記在州南十里高百七十二丈周迴二十里昔

有鳳凰集于此因置鳳山觀方輿云乃爾朱仙李淳風
養煉之地迴視郡城如在掌握碑目云唐朱鳳山觀銘
長史袁玘文 有漢充國城志云在府南三十五里按
充國漢永元二年分閬中置巴記曰初平四年復分為
南充國也邵博詩云山園翠合水連雲萬室樓臺照眼
明勝地風淳真樂國四州惟說好充城 有畫卦石志
云在治東四十里其石平如砥上有八卦相傳周柱下
史以足畫之足跡尚存 有大斗溪志云在治東八十

里源出老君山與嘉陵江合傍有大石如斗 有都尉
壩嘉陵志郡南五十里有都尉墓俗云都尉娘西充女
子也代父戍以功授都尉歸為嫂氏所嘲乃刳腹見肝
腎以死葬鳳丫山有豐碑社祀今廢其年代姓氏無攷
墓前翁仲猶存或云即陳壽妻壽嘗為騎都尉故人以
稱其妻 西北有果山寰宇記在州西八里層峯秀起
松栢生焉方輿云果山以郡得名陳壽隱居于此有祠
志云陳壽有萬卷樓在山之麓邵伯溫果山即事詩果

山仙果秀天香處處圓金樹樹芳謂黃柑也志云稟山書院
在城北五里蜀譙周建後郡人邊速達以秘書監致仕
歸隱于此藏書四千二百七十一冊碑刻為至正八年
又云治北五里有譙周觀星臺一云是其故宅有碑
存按華陽國志云譙侯修文于前陳君煥炳于後則此
山之靈秀有自來矣有金泉山方輿云在城西果山之
足唐書貞元十年謝真人名自然於縣界金泉紫極宮
白日上昇郡郭是夕有虹霓雲氣萬目所共覩焉有青

霞觀及真人祠韓愈詩果州南充縣寒女謝自然童騃
無所識但聞有神仙輕生學其術乃在金泉山一朝坐
空室雲霧生其間須臾自輕舉飄若風中烟入門無所
見冠屐同蛻蟬施肩吾謝自然昇仙詩分明得道謝自
然古來漫說尸解仙如花年少一女子身騎白鶴遊青
天有步虛臺宋鄭芳庭詩云平生酷好退之詩謝女仙
踪頗自疑不到步虛臺下看瓊笙玉佩有誰知有靈泉
院碑目云謝真人父諱寰所居名謝寰山山有院名靈

泉一唐碑字多訛缺通志云靈泉即金泉也唐李淳風
于此藏金化為泉宋江萬里書金泉二字于崖上碑目
云唐金泉山仙居述太和五年果州刺史韋公肅文唐
鄭餘慶詩刻唐誥刻偽蜀刺史徐光溥詩刻俱在金泉
山李宏遊金泉觀詩云昔時謝女昇天處此日遺蹤尚
宛然蟬蛻舊衣留石室龍飛勝地湧金泉碑書故事封
蒼蘚殿寫真容鑱翠煙薄暮松巔聽鶴唳猶疑彷彿下
神仙 有寶臺山在城西與金泉對峙有覽秀亭呂好

間覽秀亭記思史實之遺風弔譙陳之舊蹟想程謝之
仙踪慕張閭之英躅謂史謙恕實泌譙周陳壽程太虛
謝自然張嶷閭續也 有舞鳳山志云西北八里舞鳳

山三字乃宋人隸刻石 有栖樂山志云在西十里相
傳謝自然昇天之日仙樂振響峯頂故名有栖樂池在
山頂麓之以石泉水清潔與嘉陵江相通 有安漢城

志云在府城北三十五里漢地里志云有魚池在南莽
曰安新矣劉宋于此置宕渠郡又云宕渠城在府城北

四十里即石苟壩城也 有大方山方輿云城北十五里通志云城西三十里又有小方山一峯萬嶺儼若洞天其上有滴乳泉道士何志全飲此水年老面如桃紅樊汝賢詩雲液落山腹脈與崑崙通云何山中叟八十桃顏紅即今之乳泉鋪也 有昆井益州記云南充縣西六十里有大昆井即古之鹽井 有大耽山與小耽山相對志云西百里大耽山隋楊耽修道于此因名名賢馬鬣有晉譙秀墓按秀譙周之孫隱居不仕躬耕

山數李雄徵之不應晉王逸少書云聞譙周有孫其人
高尚不仕可得見否唐李商隱詩欲向巴西覓譙秀巴
西惟是有寒蕪 有馮休墓方輿云南充人真宗朝不
應辟召歸山著書 有何涉墓志云在琉璃山下按涉

讀書博古著作甚富明道雜志載其為司馬溫公所推
重 有游仲鴻墓後漢劉光祖表其道曰於乎慶元黨
人游公之墓 有趙夫子墓在據德里鄉人稱趙巽也

予遍閱唐人集元稹嘉陵江詩秦人惟識秦中水長

想吳江與蜀江今日嘉川驛樓下可憐明練繞明窓其
二云千里嘉陵江水深何年重繞此江行只應添得清
宵夢時見滿江秋月明微之又宿嘉陵驛詩嘉陵驛上
空牀客一夜嘉陵江水聲仍對牆南滿山樹野花撩亂
月朧明其二云牆外花枝壓短牆月明還照半張牀無
人會得此時意一夜獨眠西畔廊白居易嘉陵夜有懷
詩露濕牆花春意深西廊月上半牀陰憐君獨卧無言
語惟我知君此夜心其二云不明不暗朦朧月非暖非

寒慢慢風獨卧空牀好天氣平明閒事到心中武元衡
題嘉陵驛詩悠悠風旆繞山川山驛空濛雨似烟路半
嘉陵頭已白蜀門西更上青天歐陽詹聞嘉陵越鳥聲
呈林蘊詩正是閩中越鳥聲幾回留聽暗霑纓傷心激
念君深淺共有離鄉萬里情陸龜蒙宿嘉陵館樓詩離
思茫茫偏值夜每因風景却生愁今宵難作刀州夢月
色江聲共一樓李洞將之蜀別友人詩嘉陵雨色清澹
別酌參苓到蜀高諸岳窺天合四溟書來應隔雪夢覺

已無星若遇多吟友何妨勘竺經薛能嘉陵驛詩江濤
千疊閣千層銜尾相隨盡室登稠樹蔽山聞杜宇午烟
熏日食嘉陵頻題石上程多緩暫歇泉邊起不能如此
幸非名利切益州來日合携僧劉滄春日遊嘉陵江詩
獨泛扁舟映綠楊嘉陵江水色蒼蒼行看芳草故鄉遠
坐對落花春日長曲岸危檣移渡影暮天栖鳥入山光
今來誰識東歸意把酒閒吟思洛陽右嘉陵水閣中廣
元皆得稱之雖不知所指然今驛設在果州故并及之

西充縣

始析南充後乃併流溪而有之仙踪古跡特著其大陵
鎮則有扶龍山志在高陽之扶龍村蓋紀信此縣人祠
在紫嵯其小陵鎮則有肖巖石竇空潤泉水清潔矣唐
盧藏用弔紀信文曰皇綱圯兮帝紐頽王風悲兮霸道
衰天運促兮周以覆秦德棄兮漢業開何項王之顛
顛作驅除於雲雷豈淵海之飛盪資拔山之偉才於是左
契歸楚羣雄奉職皇矣漢祖獨負其直矧滎陽之圍城

兮既孤而迫偉將軍之天誘兮矯奪其識彼見危而授
命兮亦各有時考振古以為觀兮罔恢帝基感將軍之
墳隧兮壯大義之在茲仰前修以砥節顧車迴而馬遲
嗚呼身既焚兮業既昌楚歌絕兮漢道光君不旌兮史
不揚功不錄兮歿不傷奄孤墳以載葬抑千祀而為荒
皇周敷訓兮澤及枯槁伊予寡德兮忝宰茲地奉宣嘉
猷兮懼尸厥位思將軍兮允忠且義託神交於萬古兮
實獲心志乃斲石於他山兮式幽墳以昭賁詞曰攝提

貞歲兮奉揚仁風跋涉草莽兮祠弔紀公善彼勇兮殺
身為忠九原不作兮予將馬同金石刻名兮千萬歲魂
魄光烈兮為鬼雄 南岷山則有九井十三峰漢何岷

之所隱也隋程太虛嘗修煉于此志云太虛自幼好道
精修勤苦隱居南岷山絕粒有二虎侍左右九井十三
峰皆其修煉處一夕大風雨砌下得碧玉印居人每乞
符祈年印以授之輒獲豐稔唐元和中解體後遷神于
玄宮容貌不變宣宗命人求之使者過商山宿逆旅躡


險有居第如公館青童引見一道士自稱程太虛祖居西充且囑曰明歲君自蜀入南岷山無忘我及至蜀熟視畫像與前見者無異宋賜號道濟太師碑目云唐程仙師蟬蛻偈皂莢碑唐仙林觀碑中書侍郎趙彥昭撰俱在本山之降真觀 流溪縣則有鐵冠仙人鈴記云大洲連小洲此地出公侯 有漢車騎崕石刻郡國志云後漢車騎將軍馮緄於此鐫崖刻石十有餘處寰宇記云在流溪縣按金石錄云右漢車騎將軍馮緄碑以

范曄後漢書考之史云字鴻卿而碑云皇卿史云初舉孝廉七遷至廣漢屬國都尉拜御史中丞順帝末持節督揚州諸軍事與中郎將滕撫擊破羣賊今據碑自舉孝廉至為廣漢屬國都尉凡十一遷而為中丞與都使徐揚二州討賊皆在為都尉前碑云討賊時坐追州縣正法而史不載又云為隴西太守坐問吏辜旬不分去官以羌駭動為四府所表復家拜隴西太守而史但言遷隴西太守史云為遼東太守徵拜京兆尹轉司隸校尉

遷廷尉太常拜車騎將軍以碑考之緄為遼東太守以前嘗為治書侍御史遷尚書遂為廷尉未嘗拜京兆尹及司隸也史云振旅還京師監軍使者張敞承宦者旨奏緄會長沙賊復起攻桂陽武陵緄以軍還盜賊復發策免而碑云臨當受封以謠言奏河內太守中常侍左悺弟坐遜位史云復拜廷尉時山陽太守單遷以罪繫獄緄拷致其死遷故車騎將軍超之弟中官相黨遂共誹章誣緄坐輸左校而碑云表荊州刺史李隗南陽太

守成晉太原太守劉瑱不宜以重論坐法作左校亦皆不合史又云為河南尹時上言舊典中官子弟不得為牧人職帝不納拜屯騎將軍復為廷尉卒於官而碑云復廷尉奏中官子弟不宜典牧州郡獲過左右遜位永康元年薨亦當以碑為正碑又云緄謚曰桓而史亦不載余嘗謂石刻當時所書其名字官爵不應差誤可信無疑至於善惡大節則當以史氏為據今此傳首尾顛倒錯謬如此然則史之所載是非褒貶失其實者多矣

果可盡信耶 又云右漢馮使君墓闕銘云故尚書侍郎河南京令豫州刺史馮使君神道按後漢書馮緄父煥安帝時為幽州刺史而緄碑亦云幽州君之元子此字在宕渠緄墓前雙石闕上知其為煥闕也



蜀中廣記卷二十七

欽定四庫全書

史部

蜀中廣記卷三十八至

詳校官編修_臣翟槐

編修_臣程嘉謨覆勘

總校官庶吉士_臣何思鈞

校對官學正_臣陳木

謄錄舉人_臣羅允文

欽定四庫全書

蜀中廣記卷二十八

明
曹學佺 撰

名勝記第二十八

川北道

順慶府二

廣安州

治有秀屏樓霄漢閣皆顏魯公書擬峴亭南峰寺皆張

商英詠

圖經云右倚秀屏左瞰渠水志云秀屏山昔

有石土地像宋太祖以筆點此山立軍治其像因自陞

今郡治即石土地所在 通志張無盡題擬峴亭詩英

雄往事堪歎息關干徙倚情何極學取山公醉似泥不

同羊祜謀人國又題南澤寺詩孤雲飛遠岫落日滿平

川寺據南山頂僧傳北祖禪 碑目云大唐三聖碑睿

宗御製文俱在州學內道德經碑在城北紫極觀唐咸

通中州刺史程壽立公府建置碑宋開寶三年張琪記

乾德六年許允脩創也 州立於濃洄鎮濃洄二水名

寰宇記云濃水出龍扶速山東流入渠江洄水即渠水
縈洄為潭者耳按唐地里志岳池有龍扶速山環水出
焉非濃水也州志云濃水即西溪水水色常不澄故曰濃
發源距州治百二十里蓬州之綿壩流至橡樹壩二溪
相合經龍扶速山下龍棲灘與環水合又至城南五里
東折入渠江與洄水合是龍扶速山乃三溪合流處非
源也 渠江有三十六灘水之灌輸其間者渦亭渠別

莫知其幾中兩渠相距二尺廣深半之可受流觴天巧
致然非人力疏鑿 碑目云篆水在州東北五里渠江
曲尺灘下石磧平坦冬月水涸磧露仲春水生磧沒深
不盈尺日光照映金波透徹其年若登則紋宛成篆籀
潏洄波面其見不常邦人以之卜歲云 宋石刻故事
以三月三日至河曲過渠江流杯大觀乾道淳熙紹興
嘉定間知軍宇文能承務郎張廷堅德州參軍李桃陶
彥遠何溫叔游伯畏何宋卿楊次臯安康民各同時髦

游賞其中有連游二三日者如崇慶杜鵬舉奉親挈家
來遊有龍鏡潭水圓如鏡宋刻龍鏡二字于石有琉
璃淵兩水相映其一紫碧痕如羅帶其一深清淵如琉
璃俱在篆水左右江中沱磧有若鷓鴣若龜蛇若繫
絛若張繖有如明月之團圓有如神仙之遊戲皆以形
似得名名賢韻士每過其處為之流連題詠唐元稹詩
云渠江明淨峽逶迤船到名灘拽柁遲櫓竅動搖妨作
夢巴童指點笑吟詩畲餘宿麥黃山腹日背殘花白水

渭物色可憐心莫恨此行都是獨行時宋張無盡詩濃
洄江水瀉高灘中有神龍久屈蟠衆樂妙音時響亮雙
娃長袖忽爛珊世間變化無非幻閣上登臨正好歡觀
幻見真真亦幻谷花岩草謾凭欄何行中宕渠廣安駐
泊記南連巴徼北接通川複嶺東橫清江西下林深箐
密岩穴幽邃信為奇觀也 其有姜山則以伯約屯兵
而名山有姜山寺唐僖宗時建下有飛泉二字僧可徹
書志云在州東二十里 嵒然山則以嵒然山龍祠之

神得名碑目云勅賜孚惠靈公廟碑在嵒然山有晉太
康八年碑文志云在州東南四十里按安子文有嵒然
集指此 子仙山則以神仙馮勝得名志云馮緄有子
脩煉于岳門山一日辭父母謂當仙去以來晨白鶴飛
翔為候緄登此山望之已而果然又名望子山吳薦廣
安志曰子仙觀在州治西二十里子仙山上五代時居
人將軍馮勝之子脩煉于此一日仙去將軍立堂數楹
于得仙處則所謂將軍者馮勝也非漢車騎將軍馮緄

也。緄傳子鸞舉孝廉為郎中，並無得仙之事。鶴棲山

則以謝自然得名。碑目云：鶴棲山在冀都鎮，有古碑字雖漫滅，尚髣髴可認。其略云：唐貞元十年歲在甲戌，果州女子謝自然，白日昇仙。刺史李堅以狀聞，又為之傳。于時先有雙鶴棲山，按自然昇仙在果州金泉山。李堅上是俗呼為鶴棲山。自然飛迎自然，駕之而去。自其事唐德宗賜詔，今刻于金泉年月日，與此碑所載不差。通志云：在州東之新明鎮西南十里。故宕渠城古

之實國都也晉中興書曰實者廩君之苗裔巴氏之子
務相乘土船而浮衆異之立為廩君子孫布列于巴中
秦并天下以為黔中郡薄其賦稅人出錢四十巴人謂
賦為實因名大小良城石崖四絕天險之地宋史淳
祐四年制置使余玠移渠州治于此已上二則志云俱
在州東北五六十里其為名賢芳躅則有孝義臺通
志云唐陳子昂之後有遷居于此者七世同居唐旌表
之宋時臺尚存故縣鎮顏魯公碑碑目云舊傳邑宰

有姓顏者魯公之先魯公之刺湖州也過道院因有碑
銘今碑磨滅存命除湖州刺史顏真卿勒銘于道院凡
十四字乾道中移置軍城 有張唐英墓志云在州西
三十里按唐英新津人慶厯三年進士歷官殿中侍御
史卒葬雙流之三珠里紹聖三年其子庭玉徙居廣安
改葬於岳門山東南峰下其弟商英往來常居於此山
水名勝多所品題 有安丙墓志云在州南五十里宋
史吳曦僭叛丙矯密詔誅之除四川安撫使 有張庭

堅墓志云在州北宋史廷堅廣安人元祐進士為右正
言逾月數上封事訟司馬光呂著之冤疏蔡京章惇之
罪有黎錡鄉志云渠江人任直講宋英宗以蜀士問
歐陽脩對曰文行蘇洵經術黎錡也

岳池縣

寰宇記云岳安山在縣東三十五里高六百丈岳池之
水出馬上有音聲鳥也唐何少卿讀書在龍穴山方
輿云岳池之封山也去縣五里宋元豐間張諫議廷堅

讀書在羊角竹洞志云北三十里梁天監中有講道德
經者感二羊跪聽故名慶厯間狀元蒲信讀書在金隴
山志云碑見存 碑目云龜山碑在岳池縣東六十里
鑿地得斷碑乃唐人經行所記又云杜甫岷山寺詩刻
在縣北三十里岵山上有象王獅石左右龍洞書岩四
景又云老君山舊碑載唐天祐間有道士乘馬至此馬
化為石道士亦不見 其寺名之佳者志云西三十里
酉溪源自舊縣流入平灘有酉溪寺 又云西二十里

鴨山昔人見雙鴨飛入山池化為石因名上有鴨山寺
唐乾元中建 又云南二十里雲鈎寺唐貞觀建每晨
有白雲鈎其棟宇舊名毗盧也然予過縣西千佛崖古
觀寺峻級長林烟蘿下垂拂人車馬致可悅耳按畫苑
以為唐開元僧元應鑄舊額栖岩寺

渠縣

周書曰渠州言鳳凰降于楓樹百鳥列侍志云東北百
里鳳凰山梓潼化書之第五十二鳳山化也今為鳳來

里有清河寺古清河縣學基有二石柱刻螭龍甚工

華陽國志秦始皇時有長人二十五丈見宕渠太史胡
毋敬曰是後五百年外必有異人為大人者及李雄之
王祖世出自宕渠識者以為應之 寰宇記云宕渠山

一名大青山圖經云在州東五十里其山東西兩門延
連相接山澗長狹有似溝渠蜀都賦外負銅梁而宕渠
也碑目云有石刻宕渠及花果園大字 志云渠水有
三源一出達州明通鎮一出巴山一出羅娛山至三會

鎮過宕渠山會潛水至縣北會渝水經廣安南渠口會
嘉陵江至合州會涪水入江按潛水亦發源于宕渠山
麓酈道元謂宕渠縣有大穴潛水出焉通置山下而南
入于江是也 寰宇記云渝水即流江也夾水上下皆
實民所居華陽國志宕渠故實國今有實城廬城碑目
引九域志云流江古實城有古碑文字磨滅唐鄭谷渠
江旅思詩云流落復蹉跎交親半逝波謀身非不切言
命欲如何故楚青田廢窮巴瘴雨多引人鄉泪盡夜夜

竹枝歌 天寧寺記曰宕渠古郡依山為城自珠嶺東
下至石門伏而特起隱隱隆隆由郡北直南而下為馬
鞍為登高為西宕擁蔽坤維升虛降原始得郡治崗分
嶺別俛首東向為袁氏之宕迤邐南轉為瞿氏之山下
瞰巴江舒翼展脰直趨水濱而後已由瞿山之北袁宕
以南川原開曠形勢之勝與郡治相埒是為天寧寺按
賀知章題袁氏別業云主人不相識偶坐為林泉莫漫
愁沽酒囊中自有錢即袁氏宕也志亦收之 隋書地

里志通川宕渠其地皆接連漢中有八濠山寰宇云在
縣北七里起伏八處有水環之不匝者一里常有煙霧
濠其上故名三國志張卽自漢中進軍宕渠之蒙頭濠
石與張飛相拒五十餘日飛率精兵萬餘人從他道邀
卽軍交戰山道狹前後不得救飛遂破卽巴土乃安志
云上有張飛廟碑目有流江縣題名云漢將張飛率精
卒萬人大破賊首張卽于八濠立馬勒石 碑目又云
唐末中原為黃賊扇亂前進士崔塗避地于渠州春日

獨遊沖相寺由此登眺翌日北歸題名于石按沖相寺
距城四十里乃定光佛道場也崔塗本集詩云水流花
謝本無情送盡春風過楚城蝴蝶夢中家萬里杜鵑枝
上月三更故園書動經年絕華髮春催滿鏡生自是不
歸歸便得五湖煙景有誰爭方輿又載鄭谷渠州汧
江寺詩云起居瀟灑寄禪關高掛朝簪淨室間孤島暫
留雙鶴歇五雲爭放二龍閒輕舟共泛花邊水野屐同
登竹外山仙署金閨虛位久夜清應夢近天顏按古汧

江寺在縣東起文峰下宋改為祥符寺矣他若山中之
沼四時常綠洲上之魚肖像皆黃亦勝與境會云

隣水縣

寰宇記云隣水出隣山南流中有大磧懸流十丈奔急
若驚湍電瀉又云龍穴在隣山之金盤山下入龍門鎮
有瀑布百八十尺號為散水也此山出鍊隣比相次華
陽國志云宕渠郡治有鐵官石蜜山圖所采耳 志云
杜工部寓居此縣之善慶里昔建有書院岩上大鐫少

陵二字 又云郭璞游此遺碣云日出照華山金銀對馬鞍鴛鴦池裏宿石版響三潺蓋天池山下溪河中有石一方每擊則響聲三應今謂之響石板也

大竹縣

昔治在鳳來鄉接渠縣界今治在木門鎮志云縣東門城內二小岡上有兩木對生交合形如闕門元徙縣治于此二岡雖連土色則迥別矣 傳記所稱九盤七石昭其數也榮城亢谷別其象也巴河漢墓記其跡也馮

碑沈闕銘其勛也 九盤者治西十里有山高峻盤旋

九折行者憚之 七石者鴈平里有七石參差並立若

碑林然 榮城者仙門里有榮城四圍險峻高阜寬平

宋鮮史君呂保相禦元兵之所 亢谷者編戶西里有

亢谷石長數丈高五尺厥形若鰭 巴河者榮安鄉有

巴王河相傳巴王經此今為鎮 漢墓者平池里有王

平墓土人掘得銅香爐安漢侯銀牌等器有漢王將軍

字額 馮碑者廷尉馮緄此縣人墓在縣北古竇城雙

石闕西南闕高丈二尺額篆云漢車騎將軍馮公之銘
文作隸書字猶可辨 沈闕者亦雙石闕在縣北一里
其一鐫云漢謁者北屯司馬左都侯沈府君其一鐫云
漢新豐令交趾都尉府君其闕上各鐫出屋宇禽獸飛
走之像又有單石闕二相去雙石闕一里其上鐫雕物
像與此同

蓬州

圖經環蓬皆山而北山為之主溪壑奇秀兩蓬高峙屹

然雲霄多神仙隱士又多崇蘭黃花每春秋開時清香
滿山谷間 方輿云大蓬山在州東南七十里狀若海
中蓬萊因以為名小蓬山一名秀立與大蓬對峙相去
二里綏山即大蓬之始號也按列仙傳云葛由者蜀之
羌人周成王時刻木為羊賣之一旦乘木羊入蜀蜀中
王侯賓之追上綏山山在安固縣東三十里隨之者皆
得仙術本志云宋元符進士何格非遊大蓬山詩註引
葛仙翁云茲山狀類海中之山是蓬山名由此而改

山有透明岩孔穴相連宛如穿鑿之狀方輿云亦名棲
真岩在大蓬山前俯瞰縣郭天氣清明渠達諸山隱隱
可數碑目云透明岩下有爾朱真人書隔凡石三大字
又云唐人知事任惠琳所書透明崖三大字橫直各二
尺餘楷法遒勁石刻宛然志云隋爾朱真人修煉于
透明岩成道唐懿僖間抵蓬州客安漢館張氏十二年
州守以為惑衆沉于江二漁者得之釋其縛三人白日
昇天有仙閣岩夜出聖燈志云聖燈現處凡五北山

鳳凰山連翹山大蓬山小蓬山其在大蓬者尤靈異

有降香碑志云宋元豐間此州陳才人宋充媛為皇子
公主祈福立降香碑在大蓬山邑人元祐進士雍沿蓬
州十三景詩有云元豐天子太平時宮掖賢明有二姬
能就此山藝龍炷至誠為國長金枝小蓬山下有仙
女墳志云元時普安里民家女及笄一日父母他出有
道士叩門求火女不啓戶道士大書閉門不納四字而
去女手擦之不去舌舐之乃滅因感而娠父母疑而責

之不自白遂投江死其屍逆流親戚相與撈葬之忽自腹中裂出肉印方驚駭間水暴漲湧沙成一大墳于江中水左右夾流若神力焉今名仙女墳 舊縣以相如名嘉陵江遶之周地圖記云司馬相如故宅在縣南二里本地有相如坪相傳云相如別業在此西濱漢水藪薄鬱然其基亦名琴臺高六尺周四十四步碑目云相如故宅碑在相如縣西南光聖寺漫滅不可讀陳子昂文 又云唐相如縣石龕佛像記在縣治縣令陳子良撰

按子良伯玉之兄也今州有相如祠宋王儔以舊本長卿像圖于祠壁祠成為記略云伏念長卿傑出于西京文章極盛之際至今薄海內外人無賢愚皆知有長卿言語之妙若揭日月儔嘗過縣之琴臺乃圖經所謂長卿故宅者一時遺跡彷彿尚在又謂縣雖僻左而江山風物可樂也從其人遊皆好學能文章亦有所自來矣今之從政者祖律令所有乃敢知至于風化謝非已事否則日不暇也鄧侯獨以自任不辭其為政知所先務

矣按元時祠圯延祐四年驛丞苗成者重建志云嘉

陵江畔有石佛寺建于晉魏間有一僧以解龍困獲寶
盆弟子爭之龍取盆去元喬西雪歌詳其事今有驛名龍
溪或取此志又云嘉陵江有龍宮昔有鮮于氏子見人
從雲霧中引入龍宮覽諸怪異歸述家人云云志又載
鮮于氏之子遊學錦官偶老翁丐通一家信道次石門
取書置石上忽有人引生前行見一王侯曰荷君寄音
乃以藥數粒授生後生壽至百歲按石門在治北六十

里右有石梁橫卧嘉陵江中甚險元至正壬午龍斷其
梁水由中行下有深潭魚龍之巢穴也 酈道元注水

經云縣有漢車騎將軍馮緄桂陽太守李溫冢二子之
靈常以二月還則漢水暴長郡俗于水上祭之 有雞

卸神祠益州記云雞卸祠在相如縣以神在雞卸溪側
故為祠號 有芳溪館元稹感夢詩云蓬州三十里有

館名芳溪已上三則俱在水傍 若夫岩峙東西之勝

泉分金玉之形樓著文明之盛宮開紫極之祥守以真

卿始為勝地禪因宗密大振家風皆可述焉 方輿云

東岩在龍章山俯瞰大溪前眺歌陽安固諸山歷歷可
攷西岩在報恩寺西南隅前有閣曰松風謖謖來吹人
本志云咸安郡西資聖院金錢井每月月明輒有金錢
影浮水上又云州治內有玉環井形如玉環也 文明

樓額志云郡人何弱翁建臨邛魏了翁書里豪藏之家
為雷所擊移之書院雷復擊之凡三震而木不傷今懸
在北門外樓上按弱翁宋進士也了翁即魏華父丞相

志云紫極宮在州南泮宮之側東岩中峰巍然峙起
後殿上有金鑄玄宗像宮中老君殿題字乃蜀王建永
平年號 顏魯公本傳唐上元元年李輔國遷明皇于
西宮真卿率百僚上表請問起居輔國惡之貶蓬州長
史宋唐子西贈杜守詩云去天一尺古蓬州除守年來
得勝流 志云圭峰禪師名宗密相傳州之鷺鷥山有
井井側有巨人跡師母履之而孕已免師以為不祥弃
之野牛馬避弗踐鷺鷥羽覆之母乃收撫及長出家于

青蓮山講經地湧青蓮八龍聽講今有八龍池

營山縣

咸安在蓬州曰郡在營山曰縣若大蓬山則兼得而有之州之北山即縣之南山也說者以為大蓬之秀士岩飛仙岩朝陽洞魯公祠皆當縣界按秀士岩乃李特讀書處俗名天子讀書臺岩下石室刻雲屋二字志云登封縣令應真人諱靖唐僖宗時為登封令後弃官學道得仙紹興中何格非見之于大蓬飛仙岩東自是

數至格非第 又云大蓬山有朝陽洞空濶可容數百人封塞已久萬厯中重開 續碑目云營山縣顏祠有米元章書仙真事石刻乃近日南充王隆吉得於費縣草莽中者翻刻于此 其東四十里則青羊山有青羊宮元人建真武古像碑刻存焉鳳院山頂有鳳凰臺相傳鳳凰曾棲其上有龍馬槽石形隱隱如龍鱗之狀宋郡守吳幾復詩蒼石皴紋龍跡在清泉涵泳海源通西南六十里則披衣山天將雨山上雲霧馳曳如披衣

馬山上有雲山寺寺中有池去果州嘉陵江三十里江水或淺其池亦淺江水或漲其池亦漲號天生池其山又有青溪之水出焉北百二十里則孔雀洞洞門如圭竇其中宏敞左右有石床洞盡處有石孔雀水出喙中

儀隴縣

石銘儀隴洞勒金堆乃晉張英遇仙處也石門雙扇痕迹宛然事詳神仙記中古方州置在方城山下今縣

之主山也為抱朴子結菴之處有抱朴菴三字刻諸石
壁圖經葛洪詩云酒盡君莫沽壺傾我當發城市多囂
塵還山弄明月即此山作矣 志云古伏虞縣置在伏
虞山下宋僧道澄結菴于此孫諤贈以詩曰聞說虞山
有道澄白雲深處不開扃自言古佛何為者只是無心
一老僧刻石于本山之奉國寺 若夫龍車之穴四時
花發六澗之水相扶合流火井天寒焰從地出龍蛟聖
水浴蠶倍利則皆以秀特聞矣

蜀中廣記卷二十八